

船山詩草選





船山詩草選

張問陶著  
石韞玉錄

王雲五主編

叢書集成初編

船山詩草選

中華民國二十六年六月初版

著者 張問陶

選錄者 石韞玉

發行人 王雲五  
上海河南路

印刷所 商務印書館  
上海河南路

發行所 商務印書館  
上海及各埠

(本書校對者龍旭光)

●E八二三

祥

船山遺稿二十卷。於嘉慶乙亥梓於吳中。一時爲之紙貴。迨後全集板已歸蜀。而購者日多。苦無以應。人之求。適獨學老人有手錄選本。分體編次。爲卷六。得詩五百餘首。因付梓以公同好。云。時嘉慶丁丑秋。吳縣黃丕烈識。

目錄

- |    |            |
|----|------------|
| 卷一 | 五言古詩二十四首   |
| 卷二 | 七言古詩四十三首   |
| 卷三 | 五言律詩一百四十四首 |
| 卷四 | 七言律詩一百零八首  |
| 卷五 | 七言律詩一百零四首  |
| 卷六 | 五七言絕句詩八十八首 |

# 船山詩草選卷一

清 遂寧張問陶仲治著

吳縣石韞玉執如錄

## 五言古

### 城北一帶田家

鷹鷺呼長雲。魚龍逼頽岸。江流閱萬里。波勢來天半。山根鬼工鑿。千古石凌亂。何代鋤爲田。扶犁滿南澗。杉皮小屋子。四壁垂蘿蔓。朝耕課妻子。夜飲逢親串。骨肉聚鄉井。亦可忘貧賤。生死南山坡。安知離別幻。月夜展讀亥白兄書札。

君昔遊京華。我居沌水北。思君遠寄書。瑣屑動盈幅。一紙逐鴻飛。離愁滿心曲。今我客京華。君居沌水陰。翩然通尺素。重若雙南金。想君下筆日。似我當時心。泛泛楚江萍。蒼蒼燕市月。人生無百年。八載三離別。秋風萬里來。歸思憑誰說。宛轉讀君書。一燈澹于雪。

### 懷亥白兄壽門弟二首

同氣吾三人。我更長于客。咄嗟五年餘。聚日不踰百。親舍成逆旅。賓館如安宅。無事苦自擾。狂奔究誰迫。功名是何物。坐使骨肉拆。榮利已薰心。別離尤動魄。強顏向他族。無乃非良策。心驚梁里淵。感切懷遠驛。

何似常對牀。聯吟風雨夕。

昔歸歲在馬。奔泉如渴驥。

丙午

到門田舍空。觸藩苦不利。今年同登科。且作沐猴戲。

戊申

光陰一彈指。歲月偶

然寄造物。喜弄人。窮通兩難避。名言憶大蘇。朱顏寧可恃。便封萬里侯。何與骨肉事。感此謝交遊。終日忽忽睡。夢回入蓬華。騰笑伯與季。痛飲乃盡歡。狂談總無忌。醉中舞萊綵。爲我二人媚。至寶惟團圓。情真境豈僞。

遊涿州智度雲居兩廢寺

寺各  
有塔

破殿漏斜陽。螺髻昏鴉據。髣奴似黠奴。勢落打包去。臨風想雲構。樓閣空中塑。實像本非真。盛衰彈指悟。兩家牆壁通。一片松陰暮。露坐二如來。遙遙長對晤。舊時門戶別。欲辨知何處。塔影自雙分。黃金誰再布。地寒佛不靈。境熱僧先赴。世尊妙無心。只向西方住。

青羊橋

古青羊關在青羊  
水上又名羊水

暮問青羊關。寒煙聚孤堡。四山斤斧聲。嘉樹賤千草。板橋架危石。洋水一彎小。黑鳥波底行。歐魚殊了了。杉雞雪後肥。竹兔霜前狡。靈境讓樵人。清暉自娛老。

再別椒畦蒔塘

椒畦無鄙言。高澹得古趣。熟讀鄒魯書。於人誰毀譽。春衣三射策。豈以科名故。浮世重升沈。先生不喜怒。處衆愈見獨。斂華惟葆素。報國當重來。思親合歸去。淺哉王武侯。刺刺談時務。

薛塘有傲骨。嬾漫隨天真。偶然遇純袴。默坐忘懸鶉。作字小游戲。光怪超等倫。耳中聞梵貝。往往疑前身。看人獨含笑。託意殊難馴。醫貧不取錢。此志何其仁。

田橋新納雷姬屬予作詩賦此奉贈

世人忽旁妻。我意殊不然。譬彼下大夫。豈必無高賢。奇女隨清娛。妙才李絡秀。所以古神堯。明明揚側陋。矧君崇孝義。其意不在淫。瑣瑣牀第事。落落英雄心。有妾母無憂。得子妻不死。看君經世才。變化從此始。去年五月。與亥白兄別于京師廣寧門外三藐庵。亥白乘騾車不能下。余走送之。且行且語。相與灑淚而別。予今年乞假還山。已踰半載。亥白猶滯嶺南也。歲暮奉懷卻寄。

年時別君處。回首五千里。思及三藐庵。離愁轉深矣。後先國西門。驅車異苦樂。炎風昏羊城。春雲平劍閣。與君聚京華。客況殊可惱。別後憶京華。轉覺京華好。我看故鄉月。君酌他鄉酒。各有四愁詩。一箋當在手。

還家詩

壬子九月二十五日

娶妻五六年。謀歸不可必。生兒忽已死。生女已過郗。今冬得暫歸。婦孺謹若狂。草草覓輿馬。一夕齊歸裝。一夕齊歸裝。五日到家裏。入門見鄰竹。鄰竹亦可喜。父母聞婦來。快若兒新婚。慰婦且自慰。明年當抱孫。是時知悅瘍才二十二日阿嫂聞姪來。紅巾裹梨棗。攜姪看宛若。宛若亦姣好。阿弟聞嫂來。攜婦前致詞。是能讀女誡。嫂當爲之師。兄女聞妹來。牙牙若相問。老生談中庸。不知何議論。婢僕窺戶外。雞狗騰牆頭。填門無數客。賀我如封侯。賀我如封侯。我醉忽狂叫。我有南海兄。兄歸乃妙妙。明日一書至。兄已過渝州。明日一輿至。

神速如置郵。笙歌盈堂前。兄歸家始全。全家忽重聚。昔別知何年。

時帆前輩八月一日得子。夢神人贈以桂之華。因名曰桂馨。同人既飲先生于陶然亭。樂之以歌舞。子復屬內子寫桂一枝爲賀。意公子他日巍然成立爲一代偉人。當日日奉斗酒慰勞吾夫婦也。

詩人無俗事。房帷有天趣。中歲始生兒。快如得奇句。披襟一狂笑。八月來春風。舉觴酌明月。一鏡光融融。嘉名亦天錫。不費乃翁事。前夜夢常儀。凌風書桂字。湯餅聚名輩。笙歌遊名園。醉聞木犀香。四坐俱欣然。我有畫眉妻。天與生花筆。臨藁廣寒宮。一枝寫馨逸。秋光豔黃雪。綠葉何敷腴。他年文字福。視此天香圖。圖成屬公題。因公贈公子。公子弄筆時。開圖定歡喜。

贈吳寄廬

古人誓車笠。在心不在口。刺刺傾肺肝。安知非損友。平生雖疎放。所交必謹厚。十年客江湖。十年遊京師。中年倏已近。世味尤差池。過眼百萬人。飄若浮雲馳。蒼狗變白衣。浮雲亦狡獪。意外得吳君。劃然心一快。欲著結交詩。嗚呼交道壞。逐處譜金蘭。逢人指天日。悠悠輕薄兒。無物非膠漆。君有可否心。君可交者一。熱客朝登堂。豪門暮投刺。屈我父母身。逢迎無不至。君有羞惡心。君可交者二。面如十月冰。胸如萬丈潭。小人善籠絡。陰險不自慙。君有溫厚心。君可交者三。肝膽自秦越。談笑忽昆季。鬼神巧愚弄。直以人爲戲。君有樸拙心。君可交者四。藏心不可測。發言無可取。覲顏作名士。于我終何補。君有經濟心。君可交者五。

文人每相輕。鄙人每多欲。貧人競錐刀。貴人殉金玉。君無商賈心。可交不止六。嗟君不得志。市廛聊瀾迹。平心對世人。日中且交易。轉惜士大夫。欽欽抱錢癖。我初與君友。頗爲流俗怪。豈知烈丈夫。相賞形骸外。管鮑當貧時。賈焉亦何害。矧君名家子。嶽嶽龍鸞姿。讀書不求官。此意吁可知。男兒重孝義。貂蟬何足奇。鶴蓋集吾門。鴻文駭我目。不如君子人。可以慰幽獨。君有賢子孫。留詩子孫讀。

魏春松筵上送陸杉石太守元敏入蜀分韻得直字

秋風吹征塵。欲歸歸不得。送公守西川。怵然懷故國。魏侯敝離席。拈韻黃花側。四座集賢豪。人人舊相識。我爲公部人。臨觴心翼翼。醉後忽忘形。狂歌劃胸臆。梁州古天府。形勢控西極。天遙賦稅輕。地大峯巒逼。設教少詩書。雜居混方域。山川自阻深。人心亦平直。是豈無莠民。民愚終易測。願公酌寬猛。開懷感以德。餘力爲詩歌。導之以文墨。西音百年來。大雅久衰息。子弟頗聰穎。師儒昧典則。如木不繩削。如馬不羈勒。公性本舒和。論文利用刻。一郡樹規模。一方有儀式。中田雨露時。何處生螟螣。我家近涪水。無產可耕植。草堂三五閒。松竹圍秋色。飢來難久住。一官且謀食。側聞諸父老。憂貧常唧唧。人滿沃壤窮。此情殊可憶。與公幸同朝。贈言豈容默。慷慨陳土風。公其恕狂惑。

題林瑤圖照

丹鼎煮白雲。青苔步黃鶴。不聞流水聲。梅花自開落。攤書倚長劒。光氣騰巖壑。抱郭對虛舟。壯懷猶踴躍。冬夜飲酒偶然作

先我生古人。天心已偏愛。卽以詩自鳴。亦爲古人礙。我將用我法。獨立絕推戴。本無祖述心。忽已承其派。因思太極初。兩儀已對待。區區文字閒。小同又何害。惟應謝人巧。隨意發天籟。使筆如昆吾。著物見清快。悠悠三十年。自開一草昧。耽吟出天性。如酒不能戒。積卷堆尺餘。境移眞語在。古人卽偶合。豈能終一概。我而非子面。斯言殊可拜。安知峨眉奇。不出五岳外。

墨卿比部齋中與穀人侍讀。味辛舍人。春松比部。研農農部。蘭士水部。餞未谷明府之永平。以玉壺買春賞雨茅屋分韻得雨字。

炎雲如勢交。一日幾晴雨。閉門開小晏。落落同心侶。解衣恣磅礴。雜坐誰賓主。坐有遠行人。圖南氣飛舞。酒闌更移席。僮僕忘勞苦。揜扇來天風。庭空不知暑。醉鄉無禮節。世態重爾汝。感歎百年中。歡場亦可數。

庚申六月寄亥白兄成都時有奉母出川之意故作此決之

去臘移成都。新正寇臨縣。相距止五旬。危哉爭一綫。當兄別縣時。憂貧未憂盜。那知嘉陵江。一夕遂騰蹕。親朋喂豺虎。鄉閭火光燄。時無保障材。禍機胡可料。春深寇復東。來去如颶風。家山重破碎。白骨飛秋蓬。一郡增萬鬼。尸走涪江紅。妖氛莽無界。一氣橫綿潼。側聞成都城。呼號聲四起。日進一萬人。流民黑如蝮。新居幸稍定。閉戶雜悲喜。比似遂州城。城堅差可倚。書來眼生刺。字字挺荆杞。艱難念親舍。何暇悲鄉里。吁嗟殺運開。四年猶未息。平時耕讀人。對面忽成賊。凶頑危性命。寧止避其色。我往寇亦往。其來猝難測。小人猶有母。仰天呼偈仄。三歎思故鄉。亂邦留不得。願假凌風翼。浩然去此都。買舟下重慶。鼓棹趨夔巫。

平安趁秋水。或竟浮江湖。小弟官杭州。相見應歡呼。不然走荆樊。急駕如追逋。輕車來冀北。尤喜無紆途。憐茲反哺心。翹羽尋慈烏。百年一彈指。後悔非良圖。兄年過強仕。一編空在手。欲隱無青山。安能薄升斗。兒女未長成。嫂歿新姬小。生兒縱有數。生計難草草。人滿錦城置。危巢復何戀。蒼狗成白衣。浮雲日千變。豈不念松楸。春蔬已遙薦。誰家紙錢灰。能向墳頭奠。撫膺惟痛哭。劫大無神算。骨肉尙幾人。生存莫飄散。傷心原隰哀。脊令猶急難。此時治亂絲。望兄真勇斷。

題沈舫西琨太守觀空觀色圖

人生竟無欲。塊然其土木。有欲而無情。疆行亦禽鹿。惟天愛吾人。生機兼慧福。逍遙情欲天。萬物本無毒。人中生美人。如農播嘉穀。是真五行秀。清靈超百族。其來奪明月。朗朗照心目。匹如優曇花。一見恐難復。琴鶴必焚煮。拘儒真桎梏。革囊造狼語。彼法亦籠俗。仙道通陰陽。雲霄猶眷屬。陳陳三教書。幾人不誤讀。君放大光明。神光一輪足。開圖爲讚歎。此義吾所服。

齋居寫懷四首

幻想謝方壺。所居本人境。役役看妻孥。窗虛一身靜。心光照羣動。萬事付俄頃。盆花開及時。妙香惟自領。何暇冠黃冠。津津談內景。故人習禪觀。虛刀多不利。婚宦兩纏綿。轉爲佛所累。那知三世佛。步步踏平地。慧月本光明。金經乃其翳。縱橫梵夾書。一堂蔬筍氣。

道味本清寧。塵緣苦煩冗。天開世界法。那可無周孔。功名束萬變。賢志亦神聳。遺經範儒衆。文字日臃腫。淵乎五千言。青牛去何勇。

千古無信史。麟經安可復。上者垂鴻文。末流成吏牘。治亂本相因。陳陳太倉粟。虛堂堆萬卷。祇作一書讀。蒼茫經世心。別有光明燭。

美人篇

人貌充宇宙。有美忽超塵。美人實無罪。溺者自忘身。佛慈逮花鳥。何獨憎美人。革囊斥玉女。狠語殊津津。妍媸無定相。搏土憑風輪。譬如妙蓮花。凡豔誰與鄰。亭亭出淤泥。照世常清新。彼法故平等。好醜尤須均。河干能逐臭。未必皆應真。況此浮世人。何處無婚姻。儒書必莊誦。人道寧全淪。桃夭對之子。美惡皆前因。美人亦人耳。既遇宜相親。房帷期靜好。何必矜天神。戒色不戒美。美人胡可瞋。惟當絕嬌妬。燕婉和天倫。神仙猶眷屬。道妙資含醇。嫦娥坐明月。寶曜流三辰。清芬記彤管。妙孕來祥麟。瑤篇被琴瑟。萬戶歌陽春。

# 船山詩草選卷二

## 七言古

### 臨江歎

駭浪蹴日迴。驚濤激雲上。我舟一葉輕。勢與水天抗。回頭閭闔生。遙慨目中久。已無瀛海。瀛海遙環九九州。蒼茫宇宙皆浮漚。我似太倉一稊米。無衣無食依南紀。嗚呼古來烈士多苦心。夜深一誦猛虎行。

### 湘陰

十年夢繞湘江綠。今日扁舟湘水曲。青山影裏一帆來。沙樹微凋秋不俗。三十六灣斑竹林。船窗落日風森森。拈毫欲問倪高士。如此丹青何處尋。

### 懷亥白兄

丈夫志功名。焉能惜離別。良時苦蹉跎。不憤非豪傑。六月黃塵匝地飛。騎驢遠作燕山客。憔悴烏衣百不如。少年惟讀等身書。神駒所向無空闊。且上金臺弔望諸。我獨胡爲羈水國。不鳴不躍生涯拙。壯年銷損在窮途。家事如毛那可說。南詔歸帆望白頭。長安飛札待高秋。移家近日臨江住。日對江山無盡處。

### 棧中懷王椒畦學治

王郎袖得神仙筆，幻出雲山風雨疾。雄奇淡遠無不宜，冑學倪黃拘一律。春前相遇汝南第，爲我殷勤爲墨戲。仰家扇子小湘紋，歛見岡巒疊蒼翠。圖成下筆添菰蘆，愴然令我思江湖。秦關乍啓見歸客，燕市重尋失酒徒。峨峨蜀道青天上，鑿來鬼斧何橫放。人馬蟠空返照濃，世間無此好屏障。烏路縈紆通杳冥，紅氍毹背笠子青。垂巖破碎嵌雲氣，長峯排宕磨天星。子規叫雨猿晝吟，側身西望開煩襟。陳倉劍閣環抱一千里，一樹一石皆足榮園林。安能縮歸尺幅挂蓬華，使得解衣高臥如登臨。醉倚征騶屢回顧，馬蹄篤速留難住。金碧鮮明赭墨殘，看山盡是思君處。書劍飄搖絕可憐，層巒過眼隨風煙。拈豪空憶李思訓，並騎難邀吳道元。何時兩裘攜雲棧，請君重爲開生面。顚顚莫仿大同殿，要留曲磴微通線。依稀著我丹崖畔。

劍州官道古松歌

長松不合綰離別，一望雲巒盡蕭瑟。海風怒攫龍晝吟，白日無光照巖缺。橫蟠百里如筵隴，奇姿萬態羞雷同。相逢往往若縑素，不然虬髯鐵肋眞英雄。椰胡爲此鄙瑣事，細看懸佩書官字。嶺頭日日送行人，銷盡擎雲無限志。吁嗟哉，羣生位置亦有緣。山林廊廟皆徒然，君不見眉山大節凜千古。英風偉幹凌中天，桄榔林外老閑散。不如樽櫟終天年，又不見滇南謫戍古遺直。踏歌放浪悲蠻煙，金雞永絕刀環夢。至今相門雙桂空連蜷，知君不詡煙霞癖。大野通都聊混迹，道旁終有有心人。偃蹇龍鱗當自惜，怪石何年同入貢。轉教楓柳爭嘲弄，棟梁之遇自古難。可歎大材成小用。

題滄洲海市圖

昔時我祖守登州。全家都上蓬萊閣。解印惟攜東海歸。天風萬古吹囊橐。我獨生無看海緣。奇情往往空雲天。夢中不識三山影。大悔遲生十五年。蓮蕊峯人朱重穆。滄洲字視我生平有奇福。曾爲趨庭到此州。親收大海歸雙日。也知萬怪總虛無。興到何妨信手摹。意匠直隨波共遠。墨痕過處雲模糊。畫盡洪濤千萬紙。筆穿天外猶難止。忽從水面添三毫。幻出一圖名海市。誰攢萬物聚浮梗。馬足人鬚俱井井。寶樓閣擁金銀臺。一片空靈天際影。披圖目炫驚天神。影中取影皆非真。我生并此不親見。年年空喫京華塵。古今得失常相左。前有東坡後無我。悵然不肖題此圖。請君還覓眉山蘇。

題滄湄知魚樂圖

天地空明如積水。人生不樂真傖鬼。古今有我須臾耳。忽聞誑語來濠梁。以魚說法魚洋洋。漆園老吏何其狂。吾子圖之亦有託。舉以告魚魚不覺。魚亦何須知子樂。持圖問我魚何如。對君長揖吾非魚。相與大笑亡其圖。

丞相祠送松巖朴園入都

一年我送君。一年君送我。匆匆五六年。蹤跡常相左。京華庸蜀路五千。與君來往如飛仙。曉迎華山月。暮醉黃河船。區區窮達殊偶然。要令此身日與高天大地相周旋。君不見鄉中老儒縮成蝟。乾死案頭真可憐。

眉州

長公實忠孝。筆墨乃遊戲。宋時多拘儒。惟公有生氣。鄉人自昔誇漢京。我今一笑皆平平。子雲相如文士耳。安敢與公爭大名。因公愛眉州。便覺眉州好。公之靈光滿天地。眉州也是泥鴻爪。君不見城西紗縠行。舊居改作新祠堂。行人題壁多于草。執此求公公轉小。

壬子十二月六日與亥白兄攜酒遊凌雲山

腳踏凌雲峯。手摩大佛頂。大佛縮項向西笑。公等觀世真平等。是時水涸江水閒。一山濃翠浮波間。古洞轟轟答人語。懸崖奇木根如環。傾耳附石壁。風浪聲潺潺。大笑如游海門國。眼前只少松寥山。興到親提一壺酒。兄酬弟勸環山走。酒肉淋漓過戒壇。寺僧捫舌如狗饑。開山鑿險誰之功。後有韋皋前海通。一心愛人如愛佛。揮金剜眼皆英雄。我輩來遊直游戲。姓名何必留天地。碑版零星碎欲無。千年生死真容易。卻對山泉憐浩劫。泉清恐有蛟龍蟄。人外尋詩呼白雲。石根溫酒攢紅葉。荒祠四面青山青。大蘇獨坐愁零丁。我拉遺像欲飛去。旁人指點疑仙靈。不封萬戶侯。不識韓荊州。停舟聊痛飲。醉中并忘凌雲遊。隔江遙問漢嘉守。此遊頗勝東坡否。

擬爲道中

叉魚灘名東下舟如飛。斑斑風竹迎朝暉。人煙高下露城堞。流水一彎山四圍。山根蟠石皺成繭。瓊瓏百萬古篙眼。孝女崑前浪作花。船頭漩急江千轉。怪鳥一呼驚午夢。過窗立石如翁仲。劃眼軒然起大波。萬船

揉簸灘聲重。烏蒙西望迴愁予。盡雨蠻煙萬里餘。從古文人無事業。通夷敢笑馬相如。

合江縣灘上作詩投西涼王

神爲秦時呂光

鰭部水東多石梁。舟人報賽情皇皇。下官旣醉不持笏。一杯笑勸西涼王。西涼王。鬼神之事原渺茫。地險那得夸身強。腐鼠嚇人極無味。索錢索肉尤荒唐。我等酒人一生死。便投水火殊平常。南渡洞庭北河曲。東窺滄海西瞿塘。腰間大劒亮如雪。我舟一過蛟龍藏。爾神雖暴毋猖狂。

雨後過豐都

巴渝以東不風雪。披衣脫帽隆冬熱。昨夜江頭微雨來。嫩寒如過清明節。山田高下差差綠。峽鳥一聲春意足。笑看豐都十萬人。不巾不襪謹如鹿。君不見西徼萬里通諸番。馬僵人凍冰連山。平番士卒方東還。

石寶砦

子子石寶砦。屹立江水東。天作百丈臺。秀削疑人工。四山卑卑盡踈伏。頑怪獨撐斷鼉足。誰拔孤根出地中。非峯非嶺歸然禿。共工頭觸天柱折。遙看絕頂平如截。雲表微聞梵貝聲。山僧矯健真飛鶻。桓桓石柱秦將軍。大殺流賊如天神。百年父老指山哭。尙憶桃花馬上人。

白水谿

大石不受谿。谿水出其背。散如萬斛珠。破櫝一時潰。琤琮響碎玉。離離聚飛鷺。撲簌千點雪。溟濛十里霧。君不見年年五月風雷吼。急雨騰山白龍走。